

Date – 04/01/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Zokhawthara India leh Myanmar inkalpawhnaa mihring kaltlang tur tan Border Pass neih a ngai tawh dawn.
2. Krismas leh Kumthar hunpui boruak muanawm tak hnuaiia hman a nih hnu in Mizoram ah mipui ten nimin atang khan nunphung pangai an zawh leh tan.
3. Mizote nuna bet flat Zo Nun Ze mawi tlawmngaihna chu chhiat tawh nikhua in Mizote ah hmuh tur a la awm zel.
4. External Affairs Ministry chuan nimin khan thuchhuah siamin China-in India ram a luah chu India chuan a pawm ngai dawn lo tih a sawi.

<><><>

INDO-MYANMAR BORDER

Zokhawthara India leh Myanmar inkalpawhnaa mihring kaltlangna chu kumin January ni khat atangin venhimna khauh zawkin kalpui a ni a, ramri paltlang tum ten Border Pass an neih a ngai tawh dawn.

Champhai District SP chuan nimin khan thuchhuah siamin Sawrkar laipua Home Ministry thuchhuak zulzuia Mizoram Home Department in thuchhuah a siam angin India leh Myanmar ramri paltlang tumtu te chuan Border Pass an neih ngei a ngai tawh dawn a ti a, Zokhawthar leh Hnahlan atanga ramri paltlang tur, India ram atanga lut leh chhuak turte chuan Ramri atanga KM 10 huam chhunga cheng an ni ngei tih finfiahna Certificate, Police Station Officer In-charge emaw, an chenna khaw roreltu emaw, khawtlang hruaitu sawrkar hriatpui emaw hnen atangin an nei ngei tur a ni a, heng an lehkha hmang hian Ramri a duty ten Border Pass an lo siamsak thin tawh dawn a, hemi tello chuan paltlang a theih tawh dawnlo a ni.

Thuchhuah tarlan danin Border Pass hi ni 7 ral hmain Pass an lakna hmunah thehluh leh in an chenna lamah an let leh tur a ni a, Border pass hi ni sarih chhung a nung ang a, hetihlai hian KM 10 huam chhunga cheng ngei an ni tih finfiahna lehkha erawhchu kum khat chhung atan hman theih a ni thung ang.

Ramri paltlangna hmun tur hi Thawhtanni atanga Inrinni zing lam dar 6 atanga chawhnu dar 3:30 thleng hawn thin tur niin Naupang kum tling lo hnenah Border pass hi pek theih a ni lova, puitling in an hruai thei ang a, puitling pakhatin naupang pathum aia tam an hruai dawn a nih chuan Border pass dang siam belh tur a ni.

Border pass hi Police, Medical mi leh sa leh Assam Rifles a thawktuten an buaipui thin dawn a, thupek bawhchhia emaw, zawm lote chu Dan dinglai anga hrem emaw, Border pass pek loh emaw a ni dawn a ni.



FIRST WORKING DAY OF 2025

Krismas leh Kumthar hunpui boruak muanawm tak hnuaia hman a nih hnu in Mizoram ah mipui ten nimin atang khan nunphung pangai an zawh leh tan.

Hunpui avanga chawlh a nih hnu ah niminah Sawrkar Pisa te an kai leh tan a. Restricted holiday a nih angin tul zual thawk tur ni lo chu sawrkar hnathawk chawl an la tam hle a. Sawrkar Pisa a la thawl in dawr tur an la awm mang lo a, hetih lai hian Supplies department leh department thenkhat te chu mipui mamawh buaipui ngai reng an nih avangin an tul nghal hle thung a ni.

Mizoram khawpui Aizawlah chuan mipui ten nunphung pangai an zawh leh tan a. Hetih rual hian khawpui lùn thin lai leh Bazar te a la thawl hle a. Dawr thenkhat chu dawr theihin inhawng tawh mahse, dawr engemaw zat chu an la in khar thung a, Khawpui chhungah hun dang ang lo tak in traffic jam a awm lo a. Motor chhuak vak pawh tam lovin khawpui pawh a thawl hle a ni.

Nimin khan Chief Minister Office-a thawk te chuan Chief Minister Pu Lalduhoma kaihhruaiin kum thar inhlan tharna hun CM Conference Hall-ah an hmang a,

He hunah hian Chief Minister Pu Lalduhoma chuan kum khat chhung tuang takin hna an thawkho chu lawmawm atih thu sawiin thawktute thawhrimna a fak a, thawkho zel tur an n ihna ah inpawh taka engkim ti tlang thin turin a chah a, Hna a tam avangin office hunbi pela an awm chang awm thin mahse taima taka mahni hna thawk theuh turin a chah a, hna hniam bik a awmlo tih sawiin sawrkarin a mamawh avanga lak anni tih hriaa theihtawp chhuah chhunawm zel turin a chah a ni.



RAMTHAR YMA

Mizote nuna bet tlat Zo Nun Ze mawi tlawmngaihna chu khawvel changkang zel ah a dal deuh ta ti a sawi a awm thin laiin, chhiat tawh nikhua in Mizo thalai te tlawmngaihna hmuh tur a la awm chhunzawm zel.

Aizawl khawpuia Ramthar Veng YMA te chuan an veng thenawm Electric Veng tèn chhiat an tawh zawn avangin nimin khan thlan laih pui in an thawk chhuak a, Electric Veng ah hian nikum December Ni 19 atanga kumthar ni 2 thleng khan mitthi 11 neiin, an mitthi te hi lu men ngai deuh vek an ni a. Tunhnaia boral te chu a zawna lu men ngai pathum an ni a, heihi hria in, Ramthar veng Branch YMA chuan thuchhuah siamin an veng thenawm Electric Branch YMA chu thlan laih pui nise tiin Ramthar Veng Branch YMA executive committee chuan a rel a, Hnatlang an koh hnu in nimin khan Electric Veng thlan lai pui turin Mizo Tlangval engemaw zat an thawk chhuak a ni.

Electric veng YMA leh Ramthar YMA thlan laia thawk chhuak hi an vaiin mi 130 bawr ni a chhinchhiah a ni.

Mizo tlawmngaihna Zo Nun Ze Mawi kan tih hi tunlaiah kalpui a remchan lohna tam tak awm mahse YMA branch hrang hrang ten anmahni huamchhung theuhah theihtawp chhuahin an la kalpui chhunzawm zel a, Thlan laih mai bakah

khawhar chhungte in lenpui leh chhiat thata inpuih tawn chu tun hma atanga an tihdan chhunzawmin Mizoram hmun hrang hrangah kalpui chhunzawm zel a ni.

<><><>

AIZAWL NEW MARKET

Commerce & Industries Department hnuiaia Aizawl New Market Bazarpu Marketing Inspector Pu Vanlalsawma'n hunpui vuakvetah bazara mipui kal ten thupek tha tak an zawm avangin lawmthu a sawi.

Akashvani Aizawl news nena an inkawmna ah Pu Vanlalsawma chuan kum 2024 Aizawl Bazarpu New Market thil tibo 56 an awm a ti a, Pawisa tihbo zat chu cheng nuai 1, sing 7 sang 4100 a ni tih sawiin Krismas leh kumthar inkara pawisa tibo ten an hmu let leh tih sawiin mi bo an awm lo tih a sawi baw.

New Market hotute sawi danin hunpui vuakvetah thilruk hmanga chetna awm an hriatloh thu leh rukru report a awmlo an ti a, mipui bazar tura kal ten thupek an zawm tha tih sawiin bazar tura hmun hrang hranga kal ten an thlawpna ah lawmthu an sawi baw.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

ACCIDENT

Nimin chawhnu khan Champhai District-a Mualkawi khaw ram chhung, Mualkawi atanga KM 4 vela hla, National Highway No6 ah Bike FZ 150, Melbuk khaw pana kal leh Zokhawthar atanga Champhai pana kal mek, Truck an insut avangin Bike a chuang Siamthangpuia, kum 44, Melbuk khuaa Pu Zothangliana fapa chu insutna hmunah a thi.

Chetsualna hmun hi Champhai Police ten a hmunah panin thil awmdan an enfiah nghal a, lirthei chetsualna kaihhnawihah hian thubuai ziah luh nghal a ni. Nunna chan ta Siamthangpuia ruang hi nizanah Melbukah tlaivarpu niin Champhai District Hospital ah vawiin a Posmortem Examination tih a nih hnuah Melbukah vuiliam tur a ni ang.

<><><>

EXTERNAL AFFAIRS

External Affairs Ministry chuan nimin khan thuchhuah siamin India chuan China chu Brahmaputra bul hnai state-te hamthatna tichhe lo tur leh hmalakna avangin harsatna tawk lo se a duh thu an chhuah.

China rama Tibet Autonomous Region-a Yarlung Tsangpo luia hydropower project chungchansga zawhna chhangin Ministry thupuangtu Randhir Jaiswal chuan lui tui hman theihna dan aneih tawh bakah, lui thlang

lam state a nih angin New Delhi a tul ang te chu a ngaihtuah fel tawh a ni a ti a. India chuan an ram chhunga mega project kalpui chungchangah China lam hnenah uluk takin a sawipui tawh thu a sawi a, India ram hamthatna humhalh nan sorkar chuan a vil chhonzawm zel dawn a, a tul angin hma a la zel dawn tih a sawi bawk.

Thupuangtu chuan he lai hmuna dan loa China-in India ram a luah chu India chuan a pawm ngai dawn lo a ti a. Khaw thar siam hian India-in he ram rei tak alo luah tawh chu a ti danglam dawn lo tiin, China-in dan loa a luah chu pawm anih loh thu a sawi a. India chuan inbiakna hrang hrang hmangin China lam hnenah lungawi lohna nasa tak India in a thehlut tih a sawi.

<><><>